

# Ferrari

## I.

Lanquan lo temps renovelha  
e par la flors albspina,  
ai talant d'un chant novelh,  
e son florit l'albespi  
qu'ieu sai cum lo chans refri  
dousament per miei la bruelha,  
lo rossinhols s'esbaudeja.

## II.

E quan lo boscs reverdeja  
nais fresca e vertz la fuelha  
adoncas ieu reverdei  
de joi e florisc cum suelh,  
ab lo dous chan del mati,  
que fan d'amor li auzelh,  
jauzens somon a l'aurelha.

## III.

E pus l'us l'autre s'enselha,  
e-l par ves sa par s'aizina,  
de nos es dregz, que s'enselh  
quascus d'atretal aizi  
ab fin'amor ses erguelh  
qu'ieu conosc assatz e vey,  
pus la malvestatz s'orguelha  
qu'amors non deu far enveja.

## IV.

Jois ab amar cabaleja,  
e-s veston d'una despuelha,  
e cui que desabalei,  
d'escassedat mi despuelh;  
amors si senh ab joi fi,  
e jois fa d'amor capdelh,  
e malvestatz, que no fina,  
baissa pretz e-l descapdelha.

## V.

Cortezament assemblha  
amors vera e s'afina,  
que de joi fa son sembelh,  
per qu'ieu plus ves lieis acli,

e malvestatz dezacuelh  
pretz, que no sap on s'estei,  
per qu'ieu laus, jovens acuelha  
amor et ab lieis esteja.

VI.

Aissi voluda e guerreja  
mai lo ben, que Dieus lur tuelha,  
als avars, qui ieu guerrei,  
mais no val re so que·ls tuelh,  
ans porta jovens tapi  
s'amors no·i fai son apelh  
tota joja s'atapina  
c'uns no vol pretz ni l'apelha.

VII.

Res el mon non es plus belha  
d'amor veraia vezina,  
ni re non tenc mai per belh  
ni·m vol aver a vezi  
ves nulha part on reduelh,  
qu'ieu puesca trobar mersei,  
rics malvatz gara e rodelha,  
et amors ri e merseja.

VIII.

Sobre·ls melhors senhoreja  
mos chans, en qual guiza·m vuelha,  
e·ls motz lascia·ns senhorei,  
e·ls sai dir aissi cum vuelh;  
e vec vos del vers la fi,  
qu'En Grimoartz vos espelh,  
qu'ab joi lo las e l'afina,  
si·s qui be·l chant ni l'espelha.

- letto 357 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911  
CF 80209930587 PI 02133771002

---

**Source URL:** <https://letteraturaeuropea.let.uniroma1.it/?q=laboratorio/ferrari>